

ALAHADY FAHA-8 MANDAVANTAONA D



NY TENY LAZAINA NO AMANTARANA NY FO

Ry Kristianina havana, tamin'ny Alahady fahafito mandavantaona lasa teo dia nandinika sy nandalina isika ny momba ny fifandraisantsika samy isika ka napetraka ho fototr'izany fifandraisana izany ny famindrampo sy ny famelan-keloka hanahafantsika an'i Kristy hahatonga antsika ho Kristy mpiarabelona amin'olona, hampanjaka ny marina ao anatin'ny fanetrentena, rehefa manjaka tokoa ny famindrampo sy ny fifamelan-keloka dia ho hisy tokoa ny tena fihavanana marina ary tsy anatin'ny henamaso fa tena fihavanana mifototra amin'ny fahamarinana. Izany fihavanana izany no tena

marina satria ao amin'Andriamanitra izay mitondra antsika amin'ny tena fiadanana sy fahandriampahalemana izay irintsika mafy tokoa amin'ny fiainana andavanandro eo anivon'ny fiainan'ny fiaraha-monina, ny firenana sy izao tontolo izao. Amin'izao Alahady faha-8 mandavantaona izao dia mananatra antsika amin'ny fifandraisantsika andavanandro ireo vakiteny telo

Vakiteny I Ekl. 27, 4-7

Tononkira : Salamo 91

Vakiteny II : 1 Kôr. 15, 54-58

Evanjely : Lk. 6, 39-45

arosan'ny Eglizy satria mifototra amin'ny teny ataontsika izany, izay ambarantsika no hahafantarana antsika, ny teny ataontsika no maneho ny maha antsika antsika ary izay no mahatonga an'i Jesoa milaza fa tsy ny miseho ety ivelany no maharatsy antsika fa ny avy ao anatintsika. Ny teny no manambara ny ao anatintsika ao, io teny io no amborahantsika ny fontsika, ny maha antsika antsika ety ivelany. Ny teny no maneho ny toetrantsika, Md Jakoba milaza fa sambatra izay mahafolaka ny lelany satria amin'izay dia ao anatin'ny fahamarinana, ao anatin'ny fahatsorana afaka mifandray amin'ny olona tsara izy. Tsy anatin'ny henamaso na fihatsaram-belatsihy fa anatin'ny fahamarinana.

Miteny amintsika matetika aho fa diso ity teny ataon'olona hoe "toute vérité n'est pas bonne à dire", sanatria izany satria mifanohitra amin'ny fampianaran'i Jesoa, amin'ny fampianaran'ny tenin'Andriamanitra satria manambara ny marina. Tsy maintsy lazaina ny marina rehetra fa ny fomba ilazana azy sy ny toerana ilazana azy ary ny fotoana no tsy maintsy dinihina tsara.

Izany no tian'ny Eglizy ampianarana antsika amin'izao Alahady faha-8 mandavantaona raha milaza izy fa NY TENY LAZAINA NO AMANTARANA NY FO.

Ny vakiteny voalohany bokin'i Siraka mananatra antsika mba hahay hamolaka ny teny ataontsika, tsy maintsy manambara ny marina isika kanefa tsy maintsy jerena ny fomba, ny fotoana sy ny toerana hanambarana azy, amin'izay dia hamokatra voa tsara.

Ny evanjely manamafy fa fantatra amin'ny voany ny hazo tsara izany hoe ny vokatry ny teny ataontsika dia ohatry ny hazo mamokatra anankiray ka aoka ny fifandraisantsika mba ho fifandraisana miainga amin'ny teny ataontsika ka hanampy ireo manodidina antsika. Tsy amin'ny alalan'ny fihatsaram-belatsihy fa amin'ny alalan'ny fahamarinana sy anatin'ny fifamelan-keloka ary ny fifamindram-po. Ny manao ny marina no hendry ary ny marina no maha olona afaka antsika. Ny fahendrena dia isika manao ny marina ary ny marina avoakan'ny teny ataontsika no mahatonga antsika ho génération mpanorina, izany no mahatonga ny bokin'ny Siraka miteny hoe "*Aza midera olona alohany hitenenany*" izany hoe tsy fitenenana mihatsara velatsihy fa fitenena manambara ny marina sy ny fahendrena, tsy manao teny ankolaka, tsy manao kobaka ambava.

Ampianarin'ny Eglizy isika ho tahaka an'i Jesoa tsy hanao kobaka ambava, hitandrina amin'ny teny atao. Tsy ny velirano no tadiavin'ny tenin'Andriamanitra fa ny tenintsika izay mifototra amin'ny tenin'Andriamanitra tsy miovaova omaly sy anio ary mandrakizay tahaka an'i Jesoa izay tsy miova omaly anio ary mandrakizay. Nanambara i Md Paoly manamafy izany "*Fantatro ilay nametrahako ny fitokiako dia I Kristy ilay tsy mivadika mandrakizay*".

Vokatry ny teny ao anatin'ny fahamarinana sy fitokisana izany, rehefa feno toky dia afaka manorina tokoa, manorina tontolom-piainana hanjakan'ny rariny sy ny hitsiny feno fifankatiavana.

Hahafahana mifananantra, mifanohintohina sy mifanohantohana. Milaza amintsika i Jesoa "*Esory aloha ny sakamandimby amin'ny masonao, izay vao ho hitanao ny hanesoranao ny sombim-bozaka amin'ny mason'ny rahalahinao.*" Aoka tsy ho ao anatin'ny fihetsaraham-belatsihy fa ao anatin'ny fahamarinana tokoa no aoka hifandraisantsika ka afaka hifananatra marina isika tsy anatin'ny marimaritra iraisana fotsiny satria io matetika mitondra ny fifangarohan-javatra ka mahatonga ny korontana eo amin'ny fiainantsika fa tena hifanohintohina sy hifanohantohana ao anatin'ny fahamarinana.

Raha fintinina izany rehetra izany ry Kristianina havana, aoka ny teny ataontsika ho teny avy amin'Andriamanitra na dia tsy lavorary aza isika, izany no ilàna ny fifamelan-keloka sy fifamindram-po satria mety misy teny diso fa aoka anefa ao anatin'ny fahamarinana izay mitondra fifampitokisana, ho teny voafolaka tsara. Araka ny lazaintsika, haneho ny marina mandrakariva, izany no ampianarin'i Md Paoly amintsika amin'ny vakiteny faharoa "*Andriamanitra nanome antsika ny fandresena, amin'ny alalan'i Jesoa Kristy Tompontsika. Koa amin'izany, ry havako malalako, aoka ianareo hiorina mafy, tsy hiova, hahefa be mandrakariva amin'ny asan'ny Tompo, fa fantatrareo fa tsy foana ao amin'ny Tompo tsy akory ny fiasaranareo.*" Tsy hoe fandresena ho entina hanjakazaka hanapotehana ny hafa fa fandresena hanambarana izay teny marina izay, ilay teny manorina tahaka

ny fanorenana nataon'ANDriamanitra tamin'ny niandohan'izao tontolo izao.

Aoka ny teny ataontsika mba ho teny fanorenana fa tsy fanapotehana mitondra fanafintohinana, fa aoka ho teny fahamarinana sy manohana ny namana ny teny ataontsika fa izany no hahafahantsika hijoro ho vavolombelona araky ny lazain'i Md Papa Paoly 6 "tsy ny mpitory teny no tadiavin'izao androntsika izao fa ny vavolombelona". Tsy teny mihatsara velatsihy na miolakokala na anatin'ny henamaso fa teny anatin'ny marina manambara fahendrena. Izany teny ao anatin'ny marina feno fahendrena no mahatonga antsika ho génération mpanorina, ho Eglizy Olona Velona isika, manorina Eglizy Tranon'Andriamanitra. Aoka ho matotra ny teny ataontsika mahatonga ny hafa hahafantatra ny marina, hahafantatra ny làlan-kombana dia satria isika zary fahazavana sy fanilo noho ny fijoroantsika ho vavolombelona noho ny teny ataontsika. Amen

Mompera Arseveka Benjamin Ramaroson